









御纂醫宗金鑑卷二十二

訂正仲景全書金匱要畧註下之一目錄

黃疸篇第十六

大黃消石湯

茵陳五苓散

茵陳蒿湯

消石礬石散

梔子大黃湯

豬膏髮煎

嘔吐噦下利篇第十七

豬苓散

小柴胡湯

四逆湯

茱萸湯

半夏瀉心湯

半夏乾薑湯



黃芩加半夏生薑湯

大黃甘草湯

生薑半夏湯

文蛤湯

大半夏湯

茯苓澤瀉湯

橘皮竹茹湯

橘皮湯

通脈四逆湯

訶黎勒散

小承氣湯

白頭翁湯

桃花湯

桂枝湯

梔子豉湯

紫參湯

瘡癰腸癰浸淫篇第十八

薏苡附子敗醬散

大黃牡丹湯



三不留行散

黃連粉

跌蹶手指臂腫轉筋陰狐疝虻蟲篇第十九

藜蘆甘草湯

雞屎白散

蜘蛛散

甘草粉蜜湯

烏梅圓



一

二

三

四

甘肅微齋

蘇東白

蘇東白

蘇東白



御纂醫宗金鑑卷二十二

訂正仲景全書金匱要畧註下之一

黃疸病脈證并治第十六

寸口脈浮而緩浮則爲風緩則爲痺痺非中風四肢苦煩脾色必黃瘀熱以行跌陽脈緊而數數則爲熱熱則消穀緊則爲寒食卽爲滿尺脈浮爲傷腎跌陽脈緊爲傷脾風寒相搏食穀卽眩穀氣不消胃中苦濁濁氣下流小便不通陰被其寒熱流膀胱身體盡黃名曰穀疸額上黑微汗出手足中熱薄暮卽發膀胱急小便自利名曰女勞疸腹如水狀不治心中懊懣而熱不能食時欲吐名曰酒疸



註

寸口脈浮而緩浮則爲風緩則爲痺痺非中風前已詳言之矣今跌陽緊數而尺脈浮四肢苦煩身面色黃乃疸病也黃土色也土病則見之土屬脾胃脾爲陰土主濕胃爲陽土主熱故凡病疸皆爲濕瘀熱鬱也行於外則必四肢苦煩身面發黃也蓋其人素有濕熱外被風寒相搏內爲女勞所傷及食穀飲酒或與濕瘀或與熱鬱皆能爲是病也若胃脈數是熱勝於濕則從胃陽熱化熱則消穀故能食而謂之陽黃若胃脈緊是濕勝於熱則從脾陰寒化寒則不食故食卽滿而謂之陰黃也陽黃則爲熱疸酒疸陰黃則爲女勞疸穀疸也若尺脈不沉而浮則爲傷腎腎傷



病疸亦爲女勞疸也胃脈不緩而緊則爲傷脾脾傷病疸亦爲穀疸也穀疸則食穀卽滿穀氣不消胃中苦濁清氣阻於上行故頭眩也濁氣流於膀胱故小便不通也女勞疸則額上黑腎病色也微汗出濕不瘳也五心熱薄暮發腎陰熱也膀胱急小便利下焦虛也腹滿如水狀脾腎兩敗故謂不治也若心中懊懔熱不能食時欲吐小腹滿小便不利雖見目青面黑必是酒疸病也

脈沉渴欲飲水小便不利者皆發黃

註

脈沉主裏也渴欲飲水熱瘳也小便不利濕鬱也熱瘳濕鬱於裏故發黃也首條謂脈浮緩緊數皆令發黃是得之



於外因也此條脈沉亦令發黃是得之於內因也故治黃有汗下二法也

集註

李廷曰脈沉而渴渴欲飲水小便不利則濕熱內蓄無從

分消故發黃也

疸而渴者其疸難治疸而不渴者其疸可治發於陰部其人必嘔發於陽部其人振寒而發熱也

註

未成疸前小便不利而渴者是欲作疸病也已成疸後而渴者是熱深不已故難治也不渴者是熱淺將除故可治也疸發於陰者人必嘔逆嘔逆者陰裏爲之也發於陽者人必振寒發熱寒熱者陽表爲之也此以渴不渴別疸之



難治可治以嘔逆寒熱辨黃之在表在裏也

集註

程林曰黃家以濕熱相搏有口燥鼻燥而未至於渴渴則津液內消邪氣獨勝不渴則津液未竭正氣未衰治之所  
以分難易也陰主裏濕勝於裏則嘔陽主表熱勝于表則  
振寒發熱也此條辨疸證之渴與不渴有輕重表裏之分  
也

尤怡曰疸而渴則熱方熾而濕且日增故難治不渴則熱  
已減而濕亦自消故可治陰部者裏之藏府關於氣故嘔  
陽部者表之軀殼屬於形故振寒而發熱此陰陽內外淺  
深微甚之辨也



腹滿舌痿黃躁不得睡屬黃家

按

舌痿黃之舌字當是身字必傳寫之譌

註

身痿而黃腹滿而躁不得睡者屬黃家之病在裏當下之也

集註

徐彬曰腹滿裏證也乃有腹滿而加身痿黃躁不得眠

熱外行此發黃之漸也故曰屬黃家

諸黃家病但利其小便假令脈浮者當以汗解之宜桂枝加黃耆湯主之

註

諸黃家病謂一切黃家病也黃病無表裏證熱盛而渴者當清之濕盛小便不利者但當利其小便假令脈浮則為



在表當以汗解之宜桂枝加黃耆湯于此推之可知脈沉  
在裏當以下解之也

集註

高世栻曰利小便乃黃家一定之法故曰諸病黃家但利  
小便然亦自有宜汗者故又曰假令脈浮爲在表當以汗  
解之汗解之法宜桂枝加黃耆湯用桂枝湯以解肌肌解  
則汗自出加黃耆以助表表和則營衛亦通矣

桂枝加黃耆湯方

見水氣病中

師曰病黃疸發熱煩喘胸滿口燥者以病發時火劫其汗兩熱  
相得然黃家所得從濕得之一身盡發熱而黃肚熱熱在裏當  
下之



註

此詳申黃疸誤用火汗之為病也病疸者濕熱也今濕淫於內則胸滿煩喘熱淫於內則發熱口燥若病發時復以火劫其汗則為兩熱相合蓋黃家所得由濕得之則一身必盡熱而身面即發黃也今因火劫誤汗而發黃雖有表熱則不當汗也但捫其肚熱其熱在裏當下之以去其熱也

集註

程林曰濕淫於內則煩喘胸滿熱淫於內則發熱口燥復以火迫劫其汗反致兩熱相搏殊不知黃家之病必得之濕熱瘀於脾土故一身盡發熱而黃正以明火劫之誤也若肚有熱則熱在腹可下之以去其濕熱



黃疸腹滿小便不利而赤自汗出此為表和裏實當下之宜大

黃消石湯

註

此承上條互詳其證以明其治也腹滿小便不利而赤是熱在裏其人自汗出此為表和裏實也宜大黃消石湯下之

大黃消石湯方

大黃

黃蘗

消石 各四兩

梔子 十五枚

右三味以水六升煮取二升去滓內消更煮取一升頓服

集解 李昉曰腹滿小便不利而赤裏病也自汗出表和也裏病



者濕熱內甚用梔子清上焦濕熱大黃瀉中焦濕熱黃蘗清下焦濕熱消石則於苦寒瀉熱之中而有燥烈發散之意使藥力無所不至而濕熱悉消散矣

黃疸病茵陳五苓散主之

一本云茵陳湯及五苓散並主之

按黃疸病之下當有小便不利者之五字茵陳五苓散方有

著落必傳寫之遺

註黃疸病脈沉腹滿在裏者以大黃消石湯下之脈浮無汗

在表者以桂枝加黃芪湯汗之小便不利者不在表裏故以茵陳五苓散主之

茵陳五苓散方



茵陳蒿末 十分

五苓散 五分方見痰飲中

右二味和先食飲服方寸七日三服

集解

尤怡曰此正治濕熱成疸者之法茵陳散熱鬱五苓利濕

痰也

黃疸病小便色不變欲自利腹滿而喘不可除熱熱除必噦噦者小半夏湯主之

註

黃疸病小便當赤今不赤而白且欲自利雖腹滿而喘是

濕盛無熱陰黃證也切不可除熱若除熱以涼藥下之則

胃必寒而作噦噦者主之以小半夏湯以止噦也

集註

李杲曰小便色不變欲自利裏無實可知腹滿而喘脾氣



虛而肺氣不利耳用苦寒藥攻裏除熱則胃寒而虛氣上逆故噦宜小半夏湯散逆止噦

高世拭曰小便色不變非赤也欲自利非下利也若腹滿而喘雖似裏實不可投寒劑以除熱如大黃消石湯不可用也若投寒劑而除熱則必噦噦呃逆也半夏生薑辛溫散寒故噦者當以小半夏湯主之也

小半夏湯方 見痰飲中

黃疸之病當以十八日為期治之十日以上瘥反劇為難治

註

疸病屬脾脾主土土無定位寄旺於四季之末各十八日期之十八日者土旺之日也故治十日以上當瘥而不瘥



十八日之外也若踰十八日不瘥而反劇者則土衰矣故

曰難治

集註

高世栻曰十八日乃脾土寄旺于四季之期十日土之成數也黃疸之病在于脾土故當以十八日為期然治之宜先故治之十日以上即當瘥至十日以上不瘥而疸病反劇者是謂難治謂土氣虛敗不可治也

穀疸之為病寒熱不食食即頭眩心胸不安久久發黃為穀疸茵陳蒿湯主之

註

此詳申穀疸之為病也未成穀疸之時其人多病寒熱寒熱作時則不能食寒熱止時則或能食雖能食然後即

本草卷之二十一 訂正金匱要略註下



頭暈目眩心煩不安此為濕痰熱鬱而內蒸將作穀疸之徵也久久身面必發黃為穀疸矣宜茵陳蒿湯利下使從大小二便而出之

茵陳蒿湯方

茵陳蒿 六兩

梔子 十四枚

大黃 二兩

右三味以水一斗先煮茵陳減六升內二味煮取三升去滓分溫三服小便當利尿如皂角汁狀色正赤一宿腹減黃從小便去也

陽明病脈遲者食難用飽飽則發煩頭眩小便必難此欲作穀疸雖下之腹滿如故所以然者脈遲故也



註  
穀疸屬胃熱。脈當數。今脈遲。脾藏寒也。寒不化穀。所以雖  
飢欲食。食難用。飽飽則煩悶。胃中填塞。健運失常也。清者  
阻於上升。故頭眩濁者阻於下降。故小便難也。此皆欲作  
穀疸之徵。其證原從太陰寒濕鬱黷而生。若誤以為陽明  
熱濕發黃下之。雖腹滿暫減。頃復如故。所以然者。脈遲寒  
故也。此發明欲作穀疸屬脾陰寒化而不可下者也。

集註

程林曰。脈遲為寒。寒不殺穀。故食難用。飽飽則穀氣不消。  
胃中苦濁。濁氣蘊蓄。則發煩熏蒸。則作眩也。小便難者。以  
脈遲則無陽以施化。濁氣但留於胃而不宣。是以欲作穀  
疸。若下之徒虛其胃而腹滿如故也。所以然者。以脈遲為



寒之故也

黃家曰晡所發熱而反惡寒此爲女勞得之膀胱急少腹滿身盡黃額上黑足下熱因作黑疸其腹脹如水狀大便必黑時溇此女勞之病非水也腹滿者難治消石礬石散主之

許

此詳申女勞疸之爲病黃疸曰晡所發熱乃陽明熱症當

不惡寒也而反惡寒者非陽明熱症此或爲女勞得之也

女勞得之疸證雖膀胱急少腹滿而小便自利身雖盡黃而額上則黑雖發熱惟足下甚此少陰熱因作黑疸也故腹脹如水狀而大便必黑時溇知非水脹病乃爲女勞得之疸脹病也時溇黑色者亦藏病及血之徵也血病者顏



必變豈有色黑而血不病者乎女勞疸腹滿者為難治以其脾腎兩敗也以消石入血消堅礬石入氣勝濕然此方治標固宜非圖本之治世久書譌姑辨其理也

集註

尤怡曰黃家日晡所本當發熱今發熱而反惡寒者此為女勞得之疸也熱在胃淺而腎深故熱深則先反惡寒也膀胱急額上黑足下熱大便黑皆腎熱之徵雖少腹滿脹有如水狀而實為腎氣不行非脾濕而水不行也惟是證兼腹滿則脾腎並傷而其治為難耳消石鹹寒除熱礬石除痼熱在骨髓骨與腎合用以清腎熱也大麥粥和服恐傷胃也



消石礬石散方

消石

礬石 燒等分

右二味為散以大麥粥汁和服方寸七日三服病隨大小便去小便正黃大便正黑是候也

男子黃小便自利當與虛勞小建中湯

註

婦人產後經崩發黃色者乃脫血之黃色非黃疸也今男

子黃而小便自利則知非濕熱發黃也詢知其人必有失

血亡血之故以致虛黃之色外現斯時汗下滲利之法俱

不可施惟當與虛勞失血同治故以小建中湯調養營衛

黃自愈矣



集註

高世栻曰女為陰男為陽陰主血陽主氣男子黃陽氣虛也黃者土之色陽氣虛而土色外呈中無濕熱故小便自利此為虛也故當以小建中湯和其陰陽調其血氣也本論血痺虛勞篇有小建中湯主治虛勞故曰虛勞小建中意謂此男子黃而小便利亦為虛勞之證云爾

小建中湯方

見虛勞中

酒黃疸者或無熱譫言小腹滿欲吐鼻燥其脈浮者先吐之沉弦者先下之

註

此詳申酒疸之為病也酒體濕而性熱過飲之人必生濕熱為疸病也無熱無外熱也譫語鼻燥有內熱也小腹滿



濕熱畜於膀胱也欲吐濕熱釀於胃中也其脈浮者酒熱胃經先吐之以解外也沉弦者酒飲在裏先下之以解內也

集註李彥曰胃足陽明之脈起於鼻之交頰中故鼻燥也

夫病酒黃疸必小便不利其候心中熱足下熱是其證也

註此詳酒疸之病濕熱生也必小便不利其候心中熱胃府

熱也足下熱胃經熱也是其酒疸之證也

集註程林曰夫小便利則濕熱行不利則濕留於胃胃脈貫膈

下足附上熏胃腕則心中熱下注足跗則足下熱也

酒疸心中熱欲吐者吐之愈



註 此詳申酒疸宜吐之治也酒疸心中熱欲吐者謂胃中煩亂懊憹欲吐非吐之不能愈也

集註 程林曰後證熱深則懊憹欲吐今微熱則心中熱亦欲吐病屬上焦故吐之可愈也

酒黃疸心中懊憹或熱痛梔子大黃湯主之

許 此詳申酒疸宜下之治也酒黃疸謂因飲酒過度而成黃疸也心中懊憹欲吐或自吐之而愈或服梔子豉湯吐之而愈皆可也若心中懊憹不欲吐或心中熱痛皆非吐之可愈故以梔子大黃湯下之愈也

梔子大黃湯方



梔子 十四枚

大黃 一兩

枳實 五枚

豉 一升

右四味以水六升煮取三升分温二服

集解

魏荔彤曰酒黃疸心中懊懣或熱甚而痛梔子大黃湯主之蓋為實熱之邪立法也酒家積鬱成熱非此不除也

酒疸下之久久為黑疸目青面黑心中如噉蒜薑狀大便正黑皮膚爪之不仁其脈浮弱雖黑微黃故知之

註

酒疸心中懊懣或心中熱痛脈沉實者當下之若心中熱欲吐脈浮弱者當吐之而反下之則為逆也若其人素有勞倦下之則熱入於脾頃時腹滿如故則成穀疸也若其



人素有女勞下之則熱入於腎雖黃微黑久久必變爲黑  
疸也目青者精傷也面黑者腎傷也心中如噉蒜齏狀胃  
傷也大便秘黑色血傷也皮膚不仁血痺也此等証皆因酒  
疸脈浮弱者應吐而反下之之誤使然也

集註

趙良曰酒疸之黑非女勞疸之黑也蓋女勞之黑腎氣所  
發也酒疸之黑敗血之黑也因酒之濕熱傷脾胃脾胃不  
和陽氣不化陰氣不運若更下之久久則運化之用愈耗  
矣氣耗血積故腐瘀濁色越出面爲黑味變於心咽作嘈  
雜心辣如噉蒜齏狀榮血衰而不行於皮膚抓之不仁輪  
于大腸便如黑漆其目青與脈浮茲皆血病也



諸黃猪膏髮煎主之

按諸黃謂一切黃也皆主猪膏髮煎恐未必盡然醫者審之此必有脫簡也

集註程林曰扁鵲有黃經明堂有烙三十六黃法皆後人所未

見唯聖濟總錄載三十六黃方論詳明治法始備今猪膏髮煎能治諸黃當是黃之輕者可從小便而去至若陰黃急黃女勞之屬豈猪膏髮煎所能治乎醫者審之

猪膏髮煎方

猪膏 半觔

亂髮 如雞子大三枚

右二味和膏中煎之髮消藥成分再服病從小便出



諸黃腹滿而嘔者宜柴胡湯

註嘔而腹痛胃實熱也然必有潮熱便鞭始宜大柴胡湯兩解之若無潮熱便軟則當用小柴胡湯去黃芩加芍藥和之可也

集程林曰嘔而腹滿視其前後知何部不利利之則愈今黃家腹痛而嘔應內有實邪當是大柴胡湯以下之若小柴胡則可止嘔未可療腹痛也

柴胡湯方

見寒疝嘔吐中

嘔吐噦下利病脈證并治第十七

夫嘔家有癰膿不可治嘔膿盡自愈



註

嘔家嘔吐或穀或水或痰涎或冷沫今嘔而有膿此內有

癰膿潰而嘔非嘔病也故曰不可治嘔膿盡自愈

集註

趙良曰經云熱聚於胃口而不行胃脘為壅胃脘屬陽明

經陽明氣逆則嘔故膿不自效出從嘔而出此癰之在胃

脘上口者也若過半中在肺之下者膿則不從嘔出而從

大便出矣

程林曰夫癰潰則為膿膿上出必令嘔故不必治其嘔膿

盡則嘔自止也

先嘔却渴者此為欲解先渴却嘔者為水停心下此屬飲家

註

嘔病後渴飲而不嘔為胃氣和此欲解也因渴而後嘔嘔



而復渴爲水停心下此屬飲家之嘔非嘔病也

集註

趙良曰嘔則飲去飲去則陽氣回津液猶未布故渴耳雖渴終以邪去正回而必解也先渴却嘔者卽前痰飲條中小半夏茯苓湯之證也

程林曰先嘔却渴者爲嘔後而胃無津液得水和之卽愈先渴却嘔者本渴而飲水水停胃中作嘔也故屬水飲尤怡曰嘔家必有停痰宿水先嘔却渴者痰水已去而胃氣將復也故曰此爲欲解先渴却嘔者因熱飲水過多熱雖解而飲旋積也此嘔因積飲所致故曰此爲飲家

嘔家本渴今反不渴者以心下有支飲故也此屬支飲



註 嘔病之人津液已傷本應渴也今反不渴者以心下素有

支飲故也此屬支飲之嘔非嘔病也

集 徐彬曰支飲者偏旁而不中正也

高世祚曰支飲者水氣循經屈曲支行其形如腫是也支

飲而嘔故曰此屬支飲飲欬篇云嘔家本渴渴為欲解今

反不渴心下有支飲故也小半夏湯主之

諸嘔吐穀不得下者小半夏湯主之

註 此詳諸嘔吐之病以明其治也嘔者有聲有物之謂也吐

者有物無聲之謂也凡諸嘔吐飲食不得下咽者主之小

半夏湯降逆安胃也



集註趙良曰嘔吐穀不得下者有寒有熱不可概論也食入而

吐熱也朝食暮吐寒也此則非寒非熱由中焦停飲氣結而逆故用小半夏湯

沈明宗曰此痰飲多而致嘔之方也外邪內入而嘔必自飲食稍進此痰飲多而外邪少拒格胸胃之間氣逆而穀不得入故用生薑散邪半夏以消痰飲而止嘔逆

小半夏湯方

見痰飲中

嘔吐而病在膈上後思水者解急與之思水者猪苓散主之

註

此詳申上條飲嘔以明其治也嘔吐病後則傷膈上津液若思水者急與飲之不復嘔吐者是病去胃和自解也思



水者與飲之而仍嘔吐者是病未除而有水飲也主之猪  
苓散者利水以止嘔吐也

集註

程林曰上章言先嘔却渴此為欲解今嘔吐而病在膈上

後思水者解亦與上證不殊故急與之以和胃然思水之  
人又有得水而貪飲則胃中熱少不能消水更與人作病  
故思水者用猪苓散以散水飲

魏荔彤曰嘔吐而病在膈上後思水者欲解之徵也即論  
中所言先嘔後渴此為欲解之義也急與之嘔吐後傷津  
液水入而津液可復也若夫未曾嘔吐即思水者即論中  
所言先渴却嘔之證也是為水停心下應治其支飲而渴



方愈也主以猪苓散利水補土以治濕邪者治渴而卽以治上逆之嘔吐也

猪苓散方

猪苓

茯苓

白朮

各等分

右三味杵為散飲服方寸七日三服

嘔而發熱者小柴胡湯主之

註

嘔而腹滿是有裏也主之大柴胡湯攻裏以止嘔也今嘔

而發熱是有表也主之小柴胡湯和表以止嘔也

集註

程林曰經曰嘔而發熱者柴胡湯證具夫嘔家未有發熱

者以發熱屬半表半裏故與小柴胡湯以和之



李廷曰傷寒發熱者為表證然邪欲侵裏裏氣拒而不納則逆而作嘔此半表半裏證也小柴胡為治半表半裏和解之劑

小柴胡湯方

柴胡 半觔

黃芩 三兩

人參 三兩

甘草 三兩

半夏 半升

生薑 三兩

大棗 十二枚

右七味以水一斗二升煮取六升去滓再煎取三升溫服

一升日三服

嘔而脈弱小便復利身有微熱見厥者難治四逆湯主之



嘔而心煩心中懊懣內熱之嘔也今嘔而脈弱正氣虛也  
小便復利中寒盛也身有微熱而復見厥曰難治者此爲  
寒盛格熱於外非嘔而發熱者比故以四逆湯勝陰回陽  
也

集註

高世栻曰嘔者水去寒猶在上小便當少今復利者寒亦  
在下也脈弱者氣衰於內身微熱者格陽於外嘔證如是  
則上下寒而內外虛若見手足逆冷而厥者則表裏陰陽  
之氣不相順接故爲難治四逆湯主之生附子壯火回陽  
以治厥乾薑溫脾煖胃以治嘔甘草安中調上下以治內  
外也



四逆湯方

附子 一枚 生用

乾薑 一兩半

甘草 二兩炙

右三味以水三升煮取一升二合去滓分温再服強人可

大附子一枚乾薑三兩

喘而胸滿者茱萸湯主之

註 嘔逆之氣上衝於胸胸中氣實則不受邪必不滿也若胸

中氣虛客寒邪氣得以留連故胸滿也主之吳茱萸湯補

正氣降邪氣也

集 徐彬曰胸乃陽位嘔為陰邪使胸之陽氣足以禦之則不

嘔嘔亦胸中無恙也乃嘔而胸滿是胸虛邪客不但胃不



和矣虛邪屬陰故以吳茱萸之苦辛溫善驅濁陰者為君  
人參補虛為佐而以薑棗宣發上焦之正氣也

茱萸湯方

吳茱萸 一升

人參 三兩

生薑 六兩

大棗 十二枚

右四味以水五升煮取三升溫服七合日三服

嘔而腸鳴心下痞者半夏瀉心湯主之

註

嘔而腸鳴腸虛而寒也嘔而心下痞胃實而熱也並見之  
乃下寒上熱腸虛胃實之病也故主之半夏瀉心湯用參  
草大棗以補正虛半夏以降客逆乾薑以勝中寒苓連以



瀉結熱也

集註程林曰嘔而腸鳴心下痞者此邪熱乘虛而客於心下故

用芩連泄熱除痞乾薑半夏散逆止嘔內經曰脾胃虛則

腸鳴又曰中氣不足腸為之苦鳴人參大棗甘草用以補

中而和腸胃

半夏瀉心湯方

半夏半升

黃芩

乾薑

人參各三兩

黃連一兩

大棗十二枚

甘草三兩

右七味以水一斗煮取六升去渣再煮取三升溫服一升



日三服

乾嘔吐逆吐涎沫半夏乾薑散主之

註

有聲有物謂之嘔有聲無物謂之噦卽乾嘔也今有聲無物而吐涎沫故曰乾嘔吐逆吐涎沫也乾嘔吐酸苦胃中熱也乾嘔吐涎沫胃中寒也主之半夏乾薑散溫中止嘔也

半夏乾薑散方

半夏

乾薑等分

右二味杵爲散取方寸七漿水一升半煎取七合頓服之

乾嘔吐涎沫頭痛者茱萸湯主之



註 乾嘔吐涎沫者以半夏乾薑散温中止嘔也若更頭痛此屬寒氣盛而逆之甚也故用吳茱萸湯温寒下氣大折衝逆之勢也

集 徐彬曰上焦有寒其口多涎上焦既有寒邪格陽在上故

主頭痛用吳茱萸温補以驅濁陰也

李慈曰太陰少陰經從足至胸俱不上頭二經並無頭痛證厥陰經上出額與督脈會於巔故乾嘔吐涎沫者裏寒也頭痛者寒氣從經脈上攻也不用桂附用吳茱萸者以其入厥陰經故耳餘皆温補散寒之藥

乾嘔而利者黃芩加半夏生薑湯主之



註  
乾嘔者胃氣逆也若下利清漉乃腸中寒也今下利濁粘  
是腸中熱也故用黃芩湯以治其利合半夏生薑湯以治  
乾嘔也

集註  
程林曰中焦不和則氣逆於上而作嘔迫於下而為利故  
用半夏生薑入上焦而止嘔甘草大棗入中焦而和脾黃  
芩芍藥入下焦而止利如是則正氣安而邪氣去三焦和  
而嘔利止矣

魏荔彤曰此嘔為熱逆之嘔利為挾熱之利

黃芩加半夏生薑湯方

黃芩 三兩

甘草 二兩  
炙

芍藥 二兩



半夏 半升

生薑 三兩

大棗 十二枚

右六味以水一斗煮取三升去滓溫服一升日再夜一服

食少即吐者大黃甘草湯主之

註

吐者有物無聲之謂也朝食暮吐者寒也食已即吐者火也  
也以寒性遲火性急也故以大黃甘草湯緩中瀉火火平

自不吐也

集註

王肯堂曰病人欲吐者不可下之又用大黃甘草治食已

即吐何也曰欲吐者其病在上因而越之可也而逆之使

下則必抑塞憤亂而益甚故禁之若既已吐矣吐而不已

有升無降則當逆而折之引令下行無速於大黃故取之



也

程林曰經云諸逆冲上皆屬於火食已即吐是胃熱上逆而不能容食與反胃寒嘔水飲不同故用是湯以平胃熱高世拭曰食已即吐者非宿穀不化之胃反及火熱攻冲之吐逆

大黃甘草湯方

大黃

四兩

甘草

一兩

右二味以水三升煮取一升分温再服

病人欲吐者不可下之

註

病人欲吐上越之勢方盛故不可下之若病人吐後其勢



衰矣因其衰而濟之故已吐有可下之法也

集註徐彬曰治病之法貴因勢利導故內經曰在上者越之在

下者竭之今病欲上吐不可強之使下凡病皆然故曰病

人欲吐者不可下之

程林曰按欲字乃吐而未吐之義

病人胸中似喘不喘似嘔不嘔似噦不噦徹心中憤憤然無奈

者生薑半夏湯主之

註此承上條詳申欲吐之狀以明其治也喘者呼吸氣急也

似喘不喘謂胸中似喘之不快而不似喘之氣急也嘔者

吐物而有聲也似嘔不嘔謂似作嘔之狀而不似嘔之有



物也噦者乾嘔也似噦不噦謂似乎噦之有聲而不似噦之聲連連也胸徹心中憤憤然無奈者總形容似喘不喘似嘔不嘔似噦不噦心中憤亂無奈懊懷欲吐之情狀也故以半夏降逆生薑安胃也

集註

沈明宗曰似喘不喘以嘔不嘔似噦不噦誠不是喘不是嘔不是噦也徹者通也竟是通心中憤憤然無奈即泛泛惡心之義也

生薑半夏湯方

半夏 半升

生薑汁 一升

右二味以水三升煮半夏取二升內生薑汁煮取一升半



小冷分四服日三夜一服止停後服

集解

李彭曰生薑半夏辛溫之氣足以散水飲而舒陽氣然待

小冷服者恐寒飲固結于中拒熱藥而不納反致嘔逆今  
熱藥冷飲下噎之後冷體既消熱性便發情且不違而致  
大益此內經之旨也此方與前半夏乾薑湯畧同但前溫  
中氣故用乾薑此散停飲故用生薑前因嘔吐上逆頓服  
之則藥力猛峻足以止逆降氣嘔吐立除此心中無奈寒  
飲內結難以猝消故分四服使胸中邪氣徐徐散也

吐後渴欲得水而貪飲者文蛤湯主之兼主微風蠖緊頭痛

按

文蛤湯主之五字當在頭痛之下文義始屬是傳寫之譌



兼主之主字衍文也

註

吐後而渴當少少與飲之胃和吐自止也若恣意貪飲則  
新飲復停而吐必不已也當從飲吐治之若兼感微風脈  
必緊頭必痛主之文蛤湯者是治渴兼治風水也故以越  
婢湯方中加文蛤越婢散風水也文蛤治渴不已也

集註

程林曰貪飲者飲水必多多則淫溢上焦必有溢飲之患  
故用此湯以散水飲方中皆辛甘發散之藥故亦主微風

脈緊頭痛

文蛤湯方

文蛤 五兩

麻黃

甘艸



生薑 各三兩

石膏 五兩

杏仁 五十箇

大棗 十二枚

右七味以水六升煮取二升溫服一升汗出即愈

集解

李廷曰文蛤湯即大青龍湯去桂枝乃發汗之劑使水飲

從毛竅中泄去以散水飲於外經云開鬼門潔淨府此一

方兩得之以內有麻黃生薑等解表藥故兼主微風脈緊

頭痛

問曰病人脈數數為熱當消穀飲食而反吐者何也師曰以發其汗令陽氣微膈氣虛脈乃數數為客熱不能消穀胃中虛冷故也脈弦者虛也胃氣無餘朝食暮吐變為胃反寒在於上醫



反下之今脈反弦故名曰虛

按問曰病人脈數至胃中虛冷故也等句已詳傷寒論陽明篇內錯簡在此且與脈弦者虛也文義不屬

註弦飲脈也非虛脈也病吐者若見之則為胃氣無餘也胃氣無餘肝邪乘之而見弦脈故名曰虛也詢其所以致弦之由乃為寒在上醫反下之使胃氣盡而無餘則不能消化水穀致令朝食暮吐暮食朝吐變為中寒胃反也

集李彛曰食不得入是有火也食入反出是無火也此寒在上者法當溫中始愈反下之則愈虛寒而愈吐矣

寸口脈微而數微則無氣無氣則榮虛榮虛則血不足血不足



則胸中冷

按此條文義不屬必是錯簡

跌陽脈浮而濇浮則為虛虛則傷脾脾傷則不磨朝食暮吐暮  
食朝吐宿穀不化名曰胃反脈緊而濇其病難治

按虛則傷脾之虛字當是濇字是傳寫之謬

註前條因誤下而病胃反則脈弦此條不因誤下而病胃反

則脈浮而濇也跌陽脈見浮而濇浮以候胃濇以候脾浮  
而無力為胃虛濇而無力為傷脾胃虛脾傷則不能消磨  
水穀故朝食暮吐暮食朝吐所吐皆仍然不化之宿穀故  
曰胃反也若脈緊濇則為邪盛正衰故其病難治



集解徐彬曰緊為寒盛瀆為液竭正不勝邪故曰難治

胃反嘔吐者大半夏湯主之

註此承上條以明其治也胃反嘔吐者謂朝食暮吐暮食朝

吐之嘔吐也主之大半夏湯者補脾胃止嘔吐也

大半夏湯方

半夏

二升洗用

人參

三兩

白蜜

一升

右三味以水一斗二升和蜜揚之二百四十遍煮藥取一

升半溫服一升餘分再服

千金方云大半夏湯治胃反不受食食入即吐

外臺方云大半夏湯治嘔心下痞鞭者



集解

高世栻曰朝食暮吐宿穀不化名曰胃反胃反但吐不嘔然吐不離乎嘔故曰胃反嘔吐者用半夏助燥氣以消穀人參補元氣以安胃白蜜入水揚之使甘味散於水中水得蜜而和緩蜜得水而淡滲庶胃反平而嘔吐愈

李升璽曰嘔家不宜甘味此用白蜜何也不知此胃反自屬脾虛經所謂甘味人脾歸其所喜是也况君以半夏味辛而止嘔佐以人參溫氣而補中胃反自立止矣

胃反吐而渴欲飲水者茯苓澤瀉湯主之

註

胃反吐而不渴者寒也渴欲飲水者飲也故以茯苓澤瀉湯補陽利水也



茯苓澤瀉湯方

茯苓 半觔

澤瀉 四兩

甘草 二兩

桂枝 二兩

白朮 三兩

生薑 四兩

右六味以水一升煮取三升內澤瀉再煮取二升半溫服

八合日三服

外臺方云茯苓澤瀉湯治消渴胃反豚絕

集解李彛曰吐而渴者津液亡而胃虛燥也飲水則水停心下

茯苓澤瀉降氣行飲白朮補脾生津此五苓散原方之義也然胃反因脾氣虛逆故加生薑散逆甘草和脾又五苓散治外有微熱故用桂枝此胃反無寒熱而亦用之者桂



枝非一於攻表藥也乃徹上徹下達表裏為通行津液和陽治水之劑也

尤怡曰茯苓澤瀉湯治吐未已而渴欲飲水者以吐未已知邪未去則宜桂枝甘薑散邪氣茯苓澤瀉消水氣也

噦逆者橘皮竹茹湯主之

註

噦即乾嘔也因其有噦噦之聲而無他物故不曰乾嘔而曰噦逆屬氣上逆為病也上逆之氣得出上竅皆能作聲故肺虛氣上逆則作欬氣從喉出而有欬逆之聲若為邪所阻則為喘滿故無聲也胃虛氣上逆則作噦氣從咽出而有噦逆之聲若與物凝結則為痞痛故無聲也是知氣



病也明矣然邪氣所湊正氣必虛故用橘皮竹茹生薑以清邪氣人參甘草大棗以補正氣則上逆之氣自可順矣

橘皮竹茹湯方

橘皮 二觔

竹茹 二升

大棗 二十枚

生薑 半觔

甘草 五兩

人參 二兩

右六味以水一斗煮取三升溫服一升日三服

集解 李彥曰噦有屬胃寒者有屬胃熱者此噦逆因胃中虛熱

氣逆所致故用人參甘草大棗補虛橘皮生薑散逆竹茹

甘寒疏逆氣而清胃熱因以為君

尤怡曰胃虛而熱乘之則作噦逆橘皮生薑和胃散逆竹



茹除熱止嘔噦人參甘草大棗益虛安中也

乾嘔噦若手足厥者橘皮湯主之

註

乾嘔噦猶言乾嘔即噦也東垣以乾嘔為輕噦為重識神

景措辭之意也噦而手足厥乃胃陽虛是吳茱萸湯證也

若初病形氣俱實雖手足厥非陽虛陰盛者比乃氣閉不

達於四肢也故單以骨皮通氣生薑止噦也

集註

程林曰乾嘔噦則氣逆於胸膈間而不行於四末故手足

為之厥橘皮能降逆氣生薑嘔家聖藥小劑以和之也然

橘皮湯方



橘皮 四兩

生薑 半斤

右二味以水七升煮取三升溫服一升下咽則愈

噦而腹滿視其前後知何部不利利之即愈

註

噦虛邪也噦而不腹滿者為正氣虛兼有熱者以橘皮竹

茹湯主之兼有寒者以吳茱萸湯主之噦而腹滿者為邪

氣實當視其二便大便不利者下之小便不利者通之即

愈也

集註

朱肱曰前部不利猪苓湯後部不利調胃承氣湯

趙良曰腹滿為實實則氣上逆而作噦故必視其前後何

部不利而利之則滿去而噦上



魏荔彤曰胃氣上逆冲而爲噦治法當視其前後審大小便調不調也前部不利者水邪之逆也當利其小便而噦愈後部不利者熱邪實也當利其大便而噦愈

夫六府氣絕於外者手足寒上氣脚縮五藏氣絕於內者利不禁下甚者手足不仁

註

氣絕非謂脫絕乃謂虛絕也六府之氣陽也陽氣虛不溫於外則手足寒縮陽虛則陰盛上逆故嘔吐噦也五藏之氣陰也陰氣虛不固於中則下利不禁利甚則中脫形衰故手足不仁也此發明嘔吐下利之原委也

下利清穀裏寒外熱汗出而厥者通脈四逆湯主之



註 下利清穀裏寒也外熱汗出而厥陽亡也主之以通脈四

逆湯回陽勝寒而利自止也

通脈四逆湯方

附子 大者一枚 生用

乾薑 三兩 強人 可四兩

甘草 二兩 炙

右三味以水三升煮取一升二合去滓分溫再服

下利手足厥冷無脈者灸之不溫苦脈不還反微喘者死少陰

負跌陽者為順也

按

此條反微喘者死之下有少陰負跌陽者為順也一句文

義不屬其註已詳見傷寒論辨脈篇內不復釋

註

下利手足厥冷脈絕無者有陰無陽之脈證也雖用理中



四逆輩恐其緩不及事急灸臍下以通其陽若脈還手足  
溫者生脈不還手足不溫反微喘者陽氣上脫也故死

集註

程林曰下利而至於手足厥冷無脈則獨陰無陽灸之以

復其陽而脈絕不來反微喘者則正氣又脫於上孤陽無  
根故死

下利氣者當利其小便

註

下利氣者初利則為氣鬱於大腸而不外滲水氣併下但

當利其小便輸其滲瀉之竅氣宣而利止也久利則為氣

陷於大腸而不上舉又當於升補中兼利小便也

集註

尤怡曰下利氣者氣隨利失即所謂氣利是也



氣利訶黎勒散主之

討氣利所下之氣穢莫所利之物稠粘則為氣滯不宣或下之或利之皆可也若所利之氣不臭所下之物不粘則謂氣陷腸滑故用訶黎勒散以固腸或用補中益氣以舉陷亦可

訶黎勒散方

訶黎勒 十枚煨

右一味為散粥飲和頓服

集解

李昉曰氣利者下利氣虛下陷而滑脫也訶黎勒性斂澁能溫胃固腸粥飲和者假穀氣以助胃頓服者藥味併下



更有功也

尤怡曰氣利氣與屎俱失也訶黎勒瀉腸而利氣粥飲安  
中益腸胃頓服者補下治下制以急也

若下利脈數有微熱汗出令自愈設脈緊爲未解

註下利脈數內熱利也微熱汗出其邪衰矣故令自愈設脈

緊者是表未衰故爲未解也

集註程林曰寒則下利脈數有微熱則裏寒去汗出則表氣和

表裏俱和故令自愈設復緊者知寒邪尚在是爲未解也

下利有微熱而渴脈弱者令自愈

註下利大熱而渴則爲邪盛脈弱則爲正虛不能愈也今微



熱而渴脈弱者邪正俱衰故知自愈也

集註程林曰下利大熱而渴則偏於陽無熱不渴則偏於陰皆

不能愈以微熱而渴知陰陽和脈弱知邪氣去故即自愈

下利脈數而渴者令自愈設不差必清膿血以有熱故也

註此承上條邪正俱衰病當自愈而不愈之義也設不差者

則必表和熱退而數渴仍然是裏熱未除也故圖膿血

集註魏荔彤曰下利固以陽氣有餘為吉又不可太盛成熱邪

傷陰致陽復有偏勝之患

下利寸脈反浮數尺中自濇者必清膿血

註此承上表裏已和病當自愈而不愈之義也下利裏病而



得浮數表脈故曰脈反浮數也但尺中自濇則知熱陷血  
分必固膿血也

集註徐彬曰下利屬寒脈應沉遲反浮數其陽勝可知而尺中

自濇濇爲陽邪入陰此亦熱多故曰必固膿血

程林曰寸脈浮數爲熱有餘尺脈自濇爲血不足以熱有  
餘則挾熱而便膿血

下利三部脈皆平按之心下堅者急下之宜大承氣湯

註下利之人心下鞭者諸瀉心湯證也若寸關尺三部脈皆

平實有力雖下利宜攻堅也

集註李紘曰下利按之心下堅者實也設或脈見微弱猶未可



下今三部脈皆平則裏氣不虛可知自宜急下之此憑脈

又憑證之法也

大承氣湯方

見瘧病中

下利脈遲而滑者實也利未欲止急下之宜大承氣湯

註

脈遲不能兼滑惟浮取之遲沉取之滑則有之矣今下利脈遲而滑謂浮遲而沉滑也浮遲則外和沉滑則內實欲止內實之下利當下之積去則止宜大承氣湯

集註

尤怡曰脈遲為謬然與滑俱見則不為寒而反為實以中實有物能阻其脈遲行夫利因實而致者實不去則利不止故宜急下



下利脈反滑者當有所去下乃愈宜大承氣湯

註下利脈反滑者是病虛脈實不相宜也若其人形氣如常

飲食如故乃有當去之積未去也下之乃愈宜大承氣湯

集註趙良曰下利虛證也脈滑實脈也以下利之虛證而反見

滑實之脈故當有所去也

程林曰經云滑為有宿食故當下去之而利自止矣

下利已差至其年月日時復發者以病不盡故也當下之宜大

承氣湯

註下利差後至其或年或月或日而復發其利者此宿食積

病攻之不盡故也若其人形氣不衰飲食尚強當攻其未



盡自不復發其利也宜大承氣湯

集註

沈明宗曰此舊積之邪復病也下利差後至其年月日時復發者是前次下利之邪隱僻腸間今值藏府司令之期觸動舊邪而復發然隱僻之根未除終不能愈故用大承氣迅除之耳

下利譫語者有燥屎也小承氣湯主之

註

下利裏虛證也譫語裏實證也何以決其有燥屎也若脈滑數知有宿食也其利穢粘知有積熱也然必脈證如此始可知其有燥屎也宜下之以小承氣湯於此推之而燥屎又不在大便鞭不鞭也



集註李慈曰經云實則譫語故知有燥屎宜下

小承氣湯方

大黃 四兩

厚朴 三兩

枳實 大者三枚

右三味以水四升煮取一升二合去滓分温三服得利則

止

下利脈反弦發熱身汗者自愈

註

下利脾病也弦肝脈也脾病不當見弦脈故曰脈反弦也

下利裏病也發熱表證也若發熱身汗則為表與裏和雖

脈弦亦可自愈也

下利脈沉弦者下重脈大者為未止脈微弱數者為欲自止雖



發熱不死

註

沉主裏弦主急下重後重也下利脈沉弦者故裏急後重也滯下之證發熱脈大則邪盛爲未已也脈微弱數者則邪衰病當自止雖發熱不死也由此可知脈大身熱者死也

熱利下重者白頭翁湯主之

註

此承上條以明其治也下利膿血裏急後重積熱已深故以白頭翁湯大苦大寒寒能勝熱苦能燥濕濕熱去下重自除矣

集註

程林曰熱利下重則熱迫於腸胃非苦不足以堅下焦非



寒不足以除熱故加一熱字別已上之寒利

尤怡曰此證濕熱下注故用白頭翁湯苦以除濕寒以勝

熱也

白頭翁湯方

白頭翁

黃連

黃蘗

秦皮 各三兩

右四味以水七升煮取二升去滓溫服一升不愈更服

下利便膿血者桃花湯主之

註

初病下利便膿血者大承氣湯或芍藥湯下之熱盛者白

頭翁湯清之若日久滑脫則當以桃花湯養腸固脫可也



桃花湯方

赤石脂

一觔一半判  
一半篩末

乾薑

一兩

粳米

一升

右三味以水七升煮米令熟去滓温七合內赤石脂末  
寸七日三服若一服愈餘勿服

下利清穀不可攻其表汗出必脹滿

註詳見傷寒論太陰篇內不復釋

下利脈沉而遲其人面少赤身有微熱下利清穀者必鬱冒汗  
出而解病人必微厥所以然者其面戴陽下虛故也

註詳見傷寒論厥陰篇內不復釋

下利腹脹滿身體疼痛者先温其裏乃攻其表温裏宜四逆湯



攻表宜桂枝湯

註詳見傷寒論太陰篇內不復釋

桂枝湯方

桂枝 三兩

芍藥 三兩

甘草 三兩  
炙

生薑 三兩

大棗 十二枚

右五味㕮咀以水七升微火煮取三升去滓適寒溫服一

升服已須臾啜熱稀粥一升以助藥力溫覆令一時許遍

身熱熱微似有汗益佳不可令如水淋漓若一服汗出病

差停後服

下利後更煩安之心下濡者為虛煩也梔子豉湯主之



註詳見傷寒論太陽中篇不復釋

梔子豉湯方

梔子 十四枚

香豉 四合 綿裹

右二味以水四升先煮梔子得二升半內豉煮取一升半去滓分二服溫進一服得吐則止

下利肺痛紫參湯主之

按此文脫簡不釋

紫參湯方

紫參 半劬

甘草 三兩

右二味以水五升先煮紫參取二升內甘草煮取一升半



分溫三服

瘡癰腸癰浸淫病脈證并治第十八

諸浮數脈應當發熱而反洒淅惡寒若有痛處當發其癰

註諸浮數脈謂寸關尺六脈俱浮數也浮脈主表數脈主熱

若是表邪則當發熱而洒淅惡寒也今非表邪應當發熱

不當惡寒若有痛處乃當發癰之診非表邪之診也

集註周揚俊曰病之將發脈必兆之夫浮數陽也熱也浮數兼

見為陽中之陽是其熱必盡顯於外矣而反洒淅惡寒證

不相應何哉必其氣血凝滯營衛不和如經所謂營氣不

從逆於肉理乃生癰腫陽氣有餘營氣不行乃發為癰是



也况其身已有痛處乎夫脈之見者陽也其將發而痛者亦屬陽故曰當發其癰

師曰諸癰腫欲知有膿無膿以手掩腫上熱者為有膿不熱者為無膿

註諸癰腫者謂諸陰陽癰腫也不論陰陽凡諸癰腫欲知有膿無膿當以手掩之腫上熱則能腐化成膿故熱者為有膿不熱者為無膿也

集註周揚俊曰師之所以教人知癰已成欲其潰未成托之起也

腸癰之為病其身甲錯腹皮急按之濡如腫狀腹無積聚身無



熱脈數此為腸內有癰膿薏苡附子敗醬散主之

註

癰生於內則氣血為癰所奪不能外營肌膚故枯皺如甲錯也腹皮急似腫脹但按之軟詢之腹無積聚審之身無表熱診之脈數非有外證也此為腸內有癰膿也主之薏苡附子敗醬散流通腸胃消癰腫也

薏苡附子敗醬散方

薏苡仁 十分

附子 二分

敗醬 五分  
一名苦菜

右三味杵為末取方寸七以水二升煎減半頓服小便當下

集解徐彬曰薏苡寒能除熱兼下氣勝濕利腸胃破毒腫敗醬



善排膿破血利結熱毒氣故以爲臣附子導熱行結故爲

反佐

腸癰者少腹腫痞按之卽痛如淋小便自調時時發熱自汗出復惡寒其脈遲緊者膿未成可下之當有血脈洪數者膿已成不可下也大黃牡丹湯主之

註

此承上條詳發其證以明其治也腸癰者其證則少腹腫硬按之卽痛可知癰在內也溺時如淋尿色自調可知腫礙之也時時發熱汗出惡寒似有表病而實非表病也其脈遲緊則陰盛血未化其膿未成可下之大便當有血也若其脈洪數則陽盛血已腐其膿已成不可下也下之以



大黃牡丹湯消瘀瀉熱也

大黃牡丹湯方

大黃 四兩

牡丹 一兩

桃仁 五十箇

芒消 三合

瓜子 半升

右五味以水六升煮取一升去滓內芒消再煎沸頓服之

有膿當下如無膿當下血

集解李彛曰大黃芒消泄熱桃仁行瘀丹皮逐血痺去血分中

伏火瓜子主潰膿血

問曰寸口脈微而瀋法當亡血若汗出設不汗者云何答曰若

身有瘡被刀斧所傷亡血故也



註 脈微氣奪也脈瀦血奪也故曰法當亡血汗出也誤無亡

血汗出等病則必身有瘡被刀斧所傷亡血故也

集註

李彛曰汗出亡陽則脈微亡血傷陰則脈瀦微與瀦皆陰脈也設不汗而瘡瘍金瘡雖不亡陽而亡血故亦見微瀦之脈也總是營衛虛衰之故

病金瘡王不留行散主之

註

此承上條以明其治也金瘡謂刀斧所傷之瘡也亡血過多經絡血虛風寒易得干之故用王不留行散一以止血出一以防外邪也小瘡粉之即外敷也

王不留行散方



名錄卷之三十一

王不留行 十分八月 八日採

蒴藿細葉 十分七月 七日採

桑東南根 白皮十分三 月三日採

黃芩 二分

川椒 三分除目及 閉口去汗

芍藥 二分

乾薑 二分

甘草 十八分

厚朴 二分

右九味桑根皮以上三味燒灰存性勿令灰過各別杵篩合治之為散服方寸七小瘡即粉之大瘡但服之產後亦可服如風寒桑東根勿取之前三物皆陰乾百日

集解徐彬曰此乃概治金瘡方也蓋王不留行性苦平能通利

血脈故反能止金瘡血逐痛蒴藿亦通利氣血尤善開痺



周身肌肉肺主之桑根白皮最利肺氣東南根向陽生氣  
尤全以復肌肉之主氣故以此三物甚多為君甘草解毒  
和榮尤多為臣椒薑以養其胸中之陽厚朴以疏其內結  
之氣芩芍以清其陰分之熱為佐若有風寒此屬經絡客  
邪桑皮止利肺氣不能逐外邪故勿取

浸淫瘡從口流向四肢者可治從四肢流來入口者不可治

註

浸淫瘡者浸謂浸淫謂不已謂此瘡浸淫留連不已也  
從口流向四肢者輕以從內走外也故曰可治從四肢流  
走入口者重以從外走內也故曰不可治浸淫者猶今之  
癩癩之類



浸淫瘡黃連粉主之

按此承上條以明其治黃連粉方脫簡

集解尤怡曰黃連粉方未見大意以此為濕熱浸淫之病故取

黃連一味為粉粉之苦以燥濕寒以除熱也

跌蹙手指臂腫轉筋陰狐疝蚘蟲病脈證并治第十九

師曰病跌蹙其人但能前不能却刺膻入二寸此太陽經傷也

按證刺俱未詳必有缺文不釋

病人常以手指臂腫動此人身體稠稠者藜蘆甘草湯主之

按證未詳方亦缺不釋

藜蘆甘草湯方 缺



轉筋之爲病其人臂脚直脈上下行微弦轉筋入腹者雞屎白散主之

註

臂同背古通用臂脚直謂足背強直不能屈伸是轉筋之證也脈上下行謂迢迢長直微弦不和是轉筋之脈也中寒之人外寒盛則手足拘急轉筋痛不能忍甚者入腹則牽連少腹拘急而痛也主之雞屎白散以治風寒痺氣之在筋也

雞屎白散方

雞屎白

右一味爲散取方寸七以水六合和溫服



陰狐疝氣者偏有大小時時上下蜘蛛散主之

註

偏有大小謂舉丸左右有大小也時時上下謂舉丸入腹時出時入也疝厥陰之病也以與狐情狀相類故名之也主之蜘蛛散入肝以治少腹拘急而痛也

集註

趙良曰舉丸上下有若狐之出入無時也故曰狐疝

李慈曰偏有大小以舉丸言時時上下以舉丸入小腹出

囊中言

尤怡曰陰狐疝氣者寒濕襲陰而舉丸受病或左或右大小不同或上或下出沒無時故名狐疝

蜘蛛散方

（小字）



蜘蛛 十四枚  
熬煎

桂枝 半兩

右二味為散取八分一七飲和服日再服蜜圓亦可

集解 尤怡曰蜘蛛有毒服之能令人利合桂枝辛溫入陰而逐

其寒濕之氣也

問曰病腹痛有蟲其脈何以別之師曰腹中痛其脈當沉若弦

反洪大故有虵蟲

按 腹痛有蟲以洪大脈別之未詳必有缺文不釋

虵蟲之為病令人吐涎心痛發作有時毒藥不止甘草粉蜜湯

主之

註 虵蟲即今之人所名食蟲也虵蟲之為病發作有時發則



令人吐涎心痛欲死卽服攻下毒藥非積之痛乃蟲之痛故不能止也主之甘草粉蜜湯者以蟲得甘蜜而上得鉛粉而殺從治之法也

集註

徐彬曰發作有時謂不恒痛也則與虛寒之綿綿而痛者異矣毒藥不止則必治氣治血攻寒逐積之藥俱不應矣故以甘草粉蜜主之白粉殺蟲甘草與蜜既以和胃又以誘蛇也

李彭曰靈樞云蛇動則胃緩胃緩則廉泉開故涎下令人吐涎也蛇上入膈心在膈上故心痛須臾下膈則痛止故發作有時也廉泉任脈穴名在頷下骨尖中



甘草粉蜜湯方

甘草 二兩

粉 一兩

蜜 四兩

右三味以水三升先煮甘草取二升去滓內粉蜜攪令和煎如薄粥溫服一升差即止

集解

李延曰虻得甘則動其性喜故也胡粉有毒能殺蟲置粉於甘草蜜湯中誘虻食之也

虻厥者當吐虻今病者靜而復時煩此為藏寒虻上入膈故煩須臾復止得食而嘔又煩者虻聞食臭出其人當自吐虻虻厥者烏梅圓主之

按

此為藏寒之此字當是非字若是此字即為藏厥與辨虻



厥之義不屬

註

虺厥者謂虺痛手足厥冷也若藏寒痛厥則不吐虺此虺厥藏寒之所由分也靜而時煩乃虺上入其膈故煩須臾復止得食又吐又煩是虺聞食臭出故也主之烏梅丸者以虺得酸則靜得辛則伏得苦則下方中大酸大辛大苦信為治蟲之要劑也

烏梅丸方

烏梅 三百箇

細辛 六兩

乾薑 十兩

黃連 一觔

當歸 四兩

附子 六兩  
炮

川椒 四兩  
去汗

桂枝 六兩

人參 六兩



黃蘗 六兩

右十味異搗篩合治之以苦酒漬烏梅一宿去核蒸之五升米下飯熟搗成泥和藥令相得內臼中與蜜杵二千下圓如梧子大先食飲服十圓日三服稍加至二十圓禁生冷滑臭等食

集解

李昉曰烏梅味酸黃連黃蘗味苦桂枝蜀椒乾薑細辛味辛以虵得酸則止得苦則安得甘則動於上得辛則伏于下也然胃氣虛寒人參附子以溫補之吐亡津液當歸以辛潤之則虵厥可愈矣







御纂醫宗金鑑卷二十三

訂正仲景全書金匱要畧註下之二目錄

婦人妊娠篇第二十

桂枝茯苓圓

附子湯

膠艾湯

當歸芍藥散

乾薑人參半夏圓

當歸貝母苦參圓

葵子茯苓散

當歸散

白朮散

婦人產後篇第二十一

枳實芍藥散

下瘀血湯



陽旦湯

竹葉湯

竹皮大圓

白頭翁加甘草阿膠湯

婦人雜病篇第二十二

半夏厚朴湯

甘草小麥大棗湯

溫經湯

土瓜根湯

旋覆花湯

膠薑湯

大黃甘遂湯

抵當湯

礬石湯

紅藍花酒

腎氣丸

蛇床子散

狼牙湯

小兒疳蟲蝕齒方



雜療篇第二十三

四時加減柴胡飲子

長服訶黎勒圓

三物備急圓

紫石寒食散

治尸厥方

共二方

救卒死方

共五方

救卒死壯熱方

救卒死兩目閉者方

救卒死而張口反折者方

救卒死四肢不收失便者方

救小兒卒死吐利不知是何病方

救卒死客忤二方

救自縊方

療中暈方

救溺死方

馬墜及一切筋骨損方



...

...

...

...

...

...

...

...

...



御纂醫宗金鑑卷二十三

訂正仲景全書金匱要畧註下之二

婦人妊娠病脈證并治第二十

師曰婦人得平脈陰脈小弱其人渴不能食無寒熱名妊娠桂枝湯主之於法六十日當有此證設有醫治逆者却一月加吐下者則絕之

註

婦人經斷得平脈無寒熱則內外無病其人渴不能食乃妊娠惡阻之漸也故陰脈雖小弱亦可斷為有孕但惡阻於法六十日當有此證設醫不知是孕而治逆其法却一月卽有此證也若更加吐下者則宜絕止醫藥聽其自愈



可也然脈平無寒熱用桂枝湯與妊娠渴不能食者不合且文義斷續不純其中必有脫簡

集註

徐彬曰平脈者不見病脈一如平人也陰脈小弱者脈形小不大軟弱無力非細也諸脈既平而獨下焦陰脈微見不同是中上二焦無病乃反見渴不能食之證則渴非上焦之熱不能食亦非胃家之病矣少陽有嘿嘿不欲食之證今無寒熱亦無少陽表證可疑矣是渴乃陰火上熾不能食乃惡心阻食陰脈小乃胎元蝕氣故曰名妊娠也李紘曰此節病證卽妊娠惡阻是也寸爲陽脈主氣尺爲陰脈主血陰脈小弱者血不足也血以養胎則液竭而渴



又脾爲坤土厚德載物胎氣賴以奠安不能食者脾氣弱也凡有他病而渴不能食者脈必不平而有寒熱今雖不能食反得平脈又無寒熱故主妊娠

桂枝湯方

見下利中

婦人宿有癥病經斷未及三月而得漏下不止胎動在臍上者爲癥瘕害妊娠六月動者前三月經水利時胎也下血者後斷三月衃也所以血不足者其癥不去故也當下其癥桂枝茯苓丸主之

註

經斷有孕名曰妊娠妊娠下血則爲漏下婦人宿有癥瘕之疾而育胎者未及三月而得漏下下血不止胎動不安



者此爲癥瘕害之也已及六月而得漏下下血胎動不安者此亦癥瘕害之也然有血暈成塊者以前三月經雖斷血未盛胎尙弱未可下其癥瘕也後三月血成暈胎已強故主之桂枝茯苓丸當下其癥瘕也此示人妊娠有病當攻病之義也此條文義不純其中必有闕文姑存其理可也

集註

婁全善曰凡胎動多當臍今動在臍上者故知是癥也

程林曰此有癥病而懷胎者雖有漏血不止皆癥瘕之爲害非胎動胎漏之證下其癥瘕妊娠自安此內經所謂有故無殞亦無殞也



方氏曰胎動胎漏皆下血而胎動有腹痛胎漏無腹痛胎動宜行氣胎漏宜清熱

魏荔彤曰胎與胚之辨當於血未斷之前三月求之前三月之經水順利則經斷必是胎前三月有曾經下血者則經斷必成胚

桂枝茯苓丸

桂枝

茯苓

牡丹 去心

桃仁 去皮尖

芍藥 各等分

右五味末之煉蜜和丸如兔屎大每日食前服一丸不知加至三丸



婦人懷娠六七月脈弦發熱其胎愈脹腹痛惡寒者少腹如扇所以然者子藏開故也當以附子湯溫其藏

方未見

註婦人懷娠六七月脈弦發熱似表證也若其胎愈脹腹痛

惡寒而無頭痛身痛則非表證也少腹如扇狀其惡寒如扇風之侵襲也所以然者因其人陽虛子藏開寒邪侵入故用附子湯溫子藏而逐寒但方缺文亦不純必有殘缺

集註程林曰胎脹腹痛亦令人發熱惡寒少腹如扇者陰寒勝

也妊娠陰陽調和則胎氣安今陽虛陰盛不能約束胞胎故子藏為之開也附子湯用以溫經

李廷曰按子藏即子宮也臍下三寸為關元關元左二寸



爲胞門右二寸爲子戶命門爲女子繫胞之處非謂命門  
卽子藏也蓋命門是穴名在腰後兩腎中附脊骨之第十  
四椎之兩旁今經文明說少腹加扇者子藏開則子藏在  
少腹明矣豈有在少腹者而反謂其在脊後者乎此悞也  
尤怡曰脈弦發熱有似表證而乃身不痛而腹反痛背不  
惡寒而腹反惡寒甚至少腹陣陣作冷若或扇之者其所  
以然者子藏開不能闔而風冷之氣乘之也夫藏開風入  
其陰內勝則其脈弦爲陰氣而發熱且爲格陽矣胎張者  
熱則消寒則脹也附子湯方未見然溫裏散寒之意槩可  
推矣



師曰婦人有漏下者有半產後因續下血都不絕者有妊娠下血者假令妊娠腹中痛為胞阻膠艾湯主之

註

五六月墮胎者謂之半產婦人有漏下下血之疾至五六月墮胎而下血不絕者此癥瘕之害也若無癥瘕下血惟腹中痛者則為胞阻胞阻者胞中氣血不和而阻其化育也故用芎歸膠艾湯溫和其血血和而胎育也

集註

程林曰漏下者妊娠經來脈經以陽不足謂之激經也半產者以四五月墮胎墮胎必傷其血海血因續下不絕也若妊娠下血腹中痛為胞阻則用膠艾湯以治  
尤怡曰婦人經水淋瀝及胎產前後下血不止者皆衝任



脈虛而陰氣不能守也是惟膠艾湯能補而固之

芎歸膠艾湯方

芎藭

阿膠

甘草

各二兩

艾葉

當歸

各三兩

芍藥

四兩

乾地黄

右七味以水五升清酒三升合煮取三升去滓阿膠令消

盡溫服一升日三服不差更作

婦人懷娠腹中疔痛當歸芍藥散主之

按

妊娠腹中急痛用此方未詳其義必是脫簡不釋

當歸芍藥散方



當歸 三兩

芍藥 一升

茯苓 四兩

白朮 四兩

澤瀉 半斤

芎藭 半斤

右六味杵為散取方寸七酒和日三服

妊娠嘔吐不止乾薑人參半夏丸主之

註

妊娠嘔吐謂之惡阻惡阻者謂胃中素有寒飲惡阻其胎而妨飲食也主之以乾薑去寒半夏止嘔惡阻之人日日嘔吐必傷胃氣故又佐人參也

集註

程林曰寒在胃脘則令嘔吐不止故用乾薑散寒半夏生薑止嘔人參和胃半夏乾薑能下胎婁全善云余治娠阻病累用半夏未嘗動胎亦有故無殞之義臨病之工何必



枸泥

尤怡曰此益虛溫胃之法爲妊娠中虛而有寒者設也夫陽明之脈順而下行者也有寒則逆有熱亦逆逆則飲必從之而妊娠之體精凝血聚每多蘊而成熱者矣按外臺方青竹茹橘皮半夏各五兩生薑茯苓各四兩麥冬人參各三兩爲治胃熱氣逆嘔吐之法可補仲景之未備也

乾薑人參半夏丸方

乾薑

人參

各一兩

半夏

二兩

右三味末之以生薑汁糊爲丸加梧子大飲服十九日三服



妊娠小便難飲食如故當歸貝母苦參丸主之

按方證不合必有脫簡不釋

當歸貝母苦參丸方

當歸

貝母

苦參 各四兩

右三味末之煉蜜為丸如小豆大飲服三丸加至十丸

妊娠有水氣身重小便不利灑淅惡寒起即頭眩葵子茯苓散

主之

註 妊娠外有水氣則浮腫灑淅惡寒水盛貯於肌膚故身重

內有水氣則小便不利水盛阻遏陽氣上升故起即頭眩

也用葵子茯苓者是專以通竅利水為之也



葵子茯苓散方

葵子 一升

茯苓 三兩

右二味杵為散飲服方寸七日三服小便利則愈

婦人妊娠宜常服當歸散主之

註

妊娠無病不須服藥若其人瘦而有熱恐耗血傷胎宜常

服此以安之

集註

尤怡曰妊娠最慮熱傷故於芎歸芍藥養血之中用黃芩

清熱佐白朮和胃也震亨稱黃芩白朮為安胎聖藥夫芩

朮非能安胎者也去其濕熱其胎自安耳

當歸散方



當歸

黃芩

芍藥

芎藭 各一斤

白朮 半斤

右五味杵為散酒飲服方寸七日再服妊娠常服即易產胎無苦疾產後百病悉主之

妊娠養胎白朮散主之

註 妊娠婦人肥白有寒恐其傷胎宜常服此

集註 尤怡曰妊娠傷胎有因熱者亦有因寒者隨人藏氣之陰

陽而各異也當歸散正治熱之劑白朮汝君白朮和胃臣川芎調血使蜀椒去寒佐牡蠣安胎也則正治寒之劑也仲景並列此其所以昭示後人者深矣



白朮散方

白朮

芎藭

蜀椒

三分  
去汗

牡蠣

右四味杵為散酒服一錢七日三服夜一服但苦痛加芍藥心下毒痛倍加芎藭心煩吐痛不能食飲加細辛一兩半夏大者二十枚服之後更以醋漿水服之若嘔以醋漿水服之復不解者小麥汁服之已後渴者大麥粥服之病雖愈服之勿置

婦人傷胎懷身腹滿不得小便從腰已下重如有水氣狀懷身月太陰當養不養此心氣實當刺瀉勞宮及關元小便微利



則愈

按文義未詳此穴刺之落胎必是錯簡不釋

婦人產後病証并治第二十一

問曰新產婦人有三病一者病瘧二者病鬱冒三者大便難何謂也師曰新產血虛多汗出喜中風故令病瘧亡血復汗寒多故令鬱冒亡津液胃燥故大便難

註

新產之婦畏其無汗若無汗則榮衛不和而有發熱無汗似乎傷寒表病者但舌無白胎可辨也故喜其有汗而又恐汗出過多表陽不固風邪易入而為項強腰背反張之瘧病也新產之婦畏血不行若不行則血瘀於裏而有發



熱腹痛似乎傷寒裏病者但以舌無黃胎可辨也故喜其  
血下而又恐血下過多陰亡失守虛陽上厥而為昏冒不  
省合自汗出之血暈也新產雖喜其出汗喜其血行又恐  
不免過傷陰液致令胃乾腸燥而有潮熱譫語大便艱難  
似乎陽明胃家實者故仲景於產後首出三病不只為防  
未然之病而更為辨已然之疑也昏冒而曰鬱冒者謂陰  
陽虛鬱不交通而致冒也

集註

尤怡曰瘧筋病也血虛汗出筋脈失養風入而益其勁也  
鬱冒神病也亡陰血虛陽氣遂厥而陰復鬱之則頭眩而  
目昏大便難者液病也胃藏津液滲灌諸陽亡津液胃燥



則大腸失其潤而便難也三者不同其爲亡血傷津則一也

產婦鬱冒其脈微弱不能食大便反堅但頭汗出所以然者血虛而厥厥而必冒冒家欲解必大汗出以血虛下厥孤陽上出故頭汗出所以產婦喜汗出者亡陰血虛陽氣獨盛故當汗出陰陽乃復大便堅嘔不能食小柴胡湯主之病解能食七八日更發熱者此爲胃實大承氣湯主之

註

此承上條互詳其義以明其治也產婦昏冒脈微弱者是氣血俱虛應得之診也不能食者是胃氣未和應得之候也大便秘堅者是腸胃枯乾應得之病也究之鬱冒所以



然者由血虛則陰虛陰虛則陽氣上厥而必冒也冒家欲  
解必大汗出者是陽氣鬱得以外洩而解也故產婦喜汗  
出也由此推之血瘀致冒解必當血下是陰氣鬱得以內  
輸而解也最忌者但頭汗出則爲陰亡下厥孤陽上出也  
大便堅嘔不能食用小柴胡湯必其人舌有胎身無汗形  
氣不衰者始可故病得解自能食也若有汗當減柴胡無  
熱當減黃芩嘔則當倍薑半夏虛則當倍人參又在臨證之  
變通也大便堅七八日更發熱用大承氣湯亦必其人形  
氣俱實胃強能食者始可也若氣弱液乾因虛致燥難堪  
攻下石則又當內用元明粉以軟堅燥外用諸導法以潤



廣賜緩緩圖之也

集註

尤怡曰鬱冒雖有客邪而其本則為裏虛故其脈微弱也  
嘔不能食大便反堅但頭汗出津液上行不下逮之象所  
以然者亡陰血虛孤陽上厥而津液從之也厥者必冒冒  
家欲解必大汗出者陰陽乍離故厥而冒及陰陽復通汗  
乃大出而解也產婦新虛不宜多汗而此反喜汗出者血  
去陰虛陽受邪氣而獨盛汗出則邪去陽弱而後與陰相  
和所謂損陽而就陰是也

小柴胡湯

見嘔吐中

大承氣湯

見瘧病中



產婦腹中疝痛當歸生薑羊肉湯主之并治腹中寒疝虛勞不足

註

產後暴然腹中急痛產後虛寒痛也主之當歸生薑羊肉湯者補虛散寒止痛也并治虛勞不足寒疝腹痛者亦以其虛而寒也

集註

程林曰產後血虛有寒則腹中急痛內經曰味厚者為陰當歸羊肉味厚者也用以補產後之陰佐生薑以散腹中之寒則疝痛自止夫辛能散寒補能去弱三味辛溫補劑也故并主虛勞寒疝

魏荔彤曰妊娠之疝痛胞阻於血寒也產後腹中疝痛者



裏虛而血寒也一阻一虛而治法異矣

當歸生薑羊肉湯方 見寒痲中

產後腹痛煩滿不得臥枳實芍藥散主之

許

產後腹痛不煩不滿裏虛也今腹痛煩滿不得臥裏實也

氣結血凝而痛故用枳實破氣結芍藥調腹痛枳實炒令

黑者蓋因產婦氣不實也并主癰膿亦因血為氣凝久而

腐化者也佐以麥粥恐傷產婦之胃也

集尤治日產後腹痛而至煩滿不得臥知血鬱而成熱且下

病而礙上也與虛寒疔痛不同矣

枳實芍藥散方



枳實

炒令黑  
勿太過

芍藥

等分

右二味碎為散服方寸七日三服并主癰膿以麥粥下之  
師曰產婦腹痛法當以枳實芍藥散假令不愈者此為腹中有  
乾血著臍下宜下瘀血湯主之亦主經水不利

註

產婦腹痛屬氣結血凝者枳實芍藥散以調之假令服後  
不愈此為熱灼血乾著於臍下而痛非枳實芍藥之所能  
治也宜下瘀血主之下瘀血湯攻熱下瘀血也並主經水  
不通亦因熱灼血乾故也

下瘀血湯方

大黃

二兩

桃仁

二十枚

蟅蟲

二十枚  
熬去足



右三味末之煉蜜和為四丸以酒一升煎一丸取八合頓服之新血下如豚肝

集註程林曰麤蟲主開血閉大黃主攻瘀血桃仁主破死血

產後七八日無太陽證少腹堅痛此惡露不盡不大便煩躁發熱切脈微實再倍發熱日晡時煩躁者不食食則譫語至夜即愈宜大承氣湯士之熱在裏結在膀胱也

按

熱在裏結在膀胱也之八字當在本條上文惡露不盡之下未有大承氣湯下膀胱血之理必是傳寫之譌再倍二字當是衍文

字當是衍文

註無太陽證無表證也少腹堅痛有裏證也因其產後七八



日有畜血裏證而無太陽表證則可知非傷寒太陽隨經  
瘀熱在裏之病乃產後惡露未盡熱結膀胱之病當主以  
下瘀血可也若不大便不食譫語煩躁發熱日晡更甚至  
夜卽愈此爲胃實之病非惡露不盡之病以其日晡更甚  
至夜卽愈則可知病不在血分而在胃也故以大承氣湯  
下之

集註

李焘曰此一節具兩證在內一是太陽畜血證一是陽明  
裏實證因古人文法錯綜故難辨也無太陽證謂無表證  
也少腹堅痛者以肝藏血少腹爲肝經部分故血必結於  
此則堅痛亦在此此惡露不盡是爲熱在裏結在膀胱此



太陽畜血證也宜下去瘀血若不大便煩躁脈實讖語者  
陽明裏實也再倍發熱者熱在裏蒸蒸發於外也陽明旺  
於申酉戌日晡是陽明向旺時故煩躁不能食病在陽而  
不在陰故至夜則愈此陽明府病也宜大承氣湯以下胃  
實

按傷寒論曰陽明病不能食攻其熱必噦以胃中虛冷故也  
又云發熱者尤當先解表乃可攻之況在產後豈可妄議  
攻下哉必認證果真方可用此

產後風續之數十日不解頭微痛惡寒時時有熱心下悶乾嘔  
汗出雖久陽且證續在耳可與陽且湯



註

產後續感風邪數十日不解頭微痛惡寒時熱汗出表未解也雖有心下悶乾嘔之裏但有桂枝證在可與陽旦湯解表可也陽旦湯卽桂枝湯加黃芩陽旦證卽桂枝證也

集註

沈明宗曰上下三條乃產後感冒證也世謂產後氣血兩虛不論外感內傷皆以補虛爲主而仲景拈傷寒中之風傷衛發熱仍以表裏陰陽去邪爲訓故云產後中風數十日不解頭微痛惡寒時時有熱汗出乃太陽表未解也但心下悶乾嘔是外邪入於胸中之裏太陽表裏有邪謂之陽旦證故以桂枝湯加黃芩而爲陽旦湯以風邪在表故用桂枝解肌邪入胸膈之間當以清涼解其內熱故加黃



芩正謂不犯其虛是益其餘不補正而正自補不驅邪而邪自散斯爲產後感冒入神之妙方也奈後人不察其理反謂芍藥酸寒能伐生生之氣桂枝辛熱恐傷其血棄而不用以致病劇不解只因未窺仲景門堵耳故千金方以此加飴糖當歸爲當歸建中湯治產後諸虛或外感病推仲景之意嘗以此湯加減出入治產後諸病屢獲神效故表出之

尤怡曰夫審證用藥不拘日數表裏旣分汗下斯判上條裏熱成實雖產後七八日與大承氣而不傷於峻此條表不解雖數十日之久與陽旦湯而不慮其散非通於權變



者未足語此也

陽旦湯方

即桂枝湯內加黃芩  
桂枝湯方見下利中

產後中風發熱面正赤喘而頭痛竹葉湯主之

按

產後中風之下當有病瘕者之三字始與方合若無此三字則人參附子施之於中風發熱可乎而又以竹葉命名者何所謂也且方內有頸項強用大附子之文本篇有證無方則可知必有脫簡

註

產後汗多表虛而中風邪病瘕者主之竹葉湯發散太陽陽明兩經風邪用竹葉為君者以發熱面正赤有熱也用人參為臣者以產後而喘不足也頸項強急風邪之甚故



佐附子嘔者氣逆故加半夏也

集註程林曰產後血虛多汗出喜中風故令病瘥今證中未至

背反張而發熱面赤頭痛亦風瘥之漸也

竹葉湯方

竹葉 一把

葛根 三兩

防風 一兩

桔梗

桂枝

人參

甘草 各一兩

附子 一枚

大棗 十五枚

生薑 三兩

右十味以水一斗煮取二升半分溫三服溫覆使汗出頸項強用大附子一枚破之如豆大前藥揚去沫嘔者加大



半夏半升洗

婦人乳中虛煩亂嘔逆安中益氣竹皮大丸主之

按此條文義證藥未詳

竹皮大丸方

生竹茹 二分

石膏 二分

桂枝 一分

甘草 七分

白薇 一分

右五味末之棗肉和丸彈子大以飲服一丸日二夜二服  
有熱者倍白薇喘者加栝實一分

集解濟陰綱目云中虛不可用石膏煩亂不可用桂枝此方以

甘草七分配衆藥六分又以棗肉爲丸仍以一丸飲下可



想其立方之微用藥之難審虛實之不易也仍飲服者尤慮夫虛虛之禍耳用是方者亦當深省

產後下利及虛極白頭翁加甘草阿膠湯主之

按此條文義證藥不合不釋

白頭翁加甘草阿膠湯方

白頭翁

甘草

阿膠 各二兩

秦皮

黃連

藥皮 各三兩

右六味以水七升煮取二升半內膠令消盡分溫三服

婦人雜病脈證并治第二十二

婦人之病因虛積冷結氣為諸經水斷絕至有歷年血寒積結



胞門寒傷經絡凝堅在上嘔吐涎唾久成肺癰形體損分在中  
盤結繞臍寒疝或兩脇疼痛與臟相連或結熱中痛在關元脈  
數無瘡肌若魚鱗時著男子非止女身在下來多經候不勻令  
陰掣痛少腹惡寒或引腰脊下根氣衝急痛膝脛疼煩奄  
忽眩冒狀如厥癩或有憂慘悲傷多嗔此皆帶下非有鬼神久  
則羸瘦脈虛多寒三十六病千變萬端審脈陰陽虛實緊弦行  
其鍼藥治危得安其雖同病脈各異源子當辯記勿謂不然

按

此條爲婦人雜病提綱當冠篇首以揭病情在下來多之  
來字當是未字本條皆經水斷絕之病若係來多則與上  
文不合與下文經候不勻亦不合又本條內有此皆帶下



一句當在非有鬼神之下文義相屬是傳寫之譌

註

此條爲婦人諸病綱領其病之所以異於男子者以其有月經也其月經致病之根源則多因虛損積冷結氣也三者一有所感皆能使經水斷絕至有歷年寒積胞門以致血凝氣結而不行者先哲云女子以經調爲無病若經不調則變病百出矣以下皆言三者阻經之變病其變病之不同各因其人之臟腑經絡寒熱虛實之異也如寒外傷經絡其人上焦素寒則凝堅在上故上焦胸肺受病也形寒傷肺則氣滯阻飲故嘔吐涎唾也若其人上焦素熱寒同其化久則成熱熱傷其肺故成肺癰而形體損瘦也若



其人中焦素寒則在中盤結故繞臍疝痛也或兩脇疼痛  
是中焦之部連及肝臟故也或其中焦素熱則不病寒  
疝而病結熱於中矣中熱故不能爲寒疝而繞臍之痛仍  
在關元也其人脈數當生瘡若無瘡則熱必灼陰皮膚失  
潤故肌粗若魚鱗也然此嘔吐涎唾寒疝疼痛肌若魚鱗  
等病亦時著男子非止女子病也在下未多謂經候不勻  
而血不多下也邪侵胞中乃下焦之部故病陰中掣痛少  
腹惡寒也或痛引腰脊下根氣街急痛腰膝疼煩皆胞中  
衝任爲病所必然也或痛極奄忽眩冒狀如厥癰亦痛甚  
之常狀也若其人或有憂慘悲傷多嗔之遇而見此眩冒



厥巔之證實非有鬼神也凡此胞中衝任血病皆能病帶  
故諺曰十女九帶也然帶下病久津液必傷形必羸瘦診  
其脈虛審其多寒豈止病此三十六病而千變萬端矣雖  
千變萬端然必審脈陰陽虛實緊弦與病參究行其鍼藥  
治危得安也其有病雖同而脈不同者則當詳加審辨故  
曰子當辨記勿謂不然也

婦人咽中如有炙𩺰半夏厚朴湯主之

註

咽中如有炙𩺰謂咽中有痰涎如同炙肉咯之不出嚥之  
不下者卽今之梅核氣病也此病得於七情鬱氣凝涎而  
生故用半夏厚朴生薑辛以散結苦以降逆茯苓佐半夏



以利飲行涎紫蘇芳香以宜通鬱氣俾氣舒涎去病自愈  
矣此證男子亦有不獨婦人也

集尤怡曰凝痰結氣阻塞咽噎之間千金所謂咽中帖帖如  
註有炙肉吞之不下吐之不出者是也

半夏厚朴湯方

半夏 一升

厚朴 三兩

茯苓 四兩

生薑 五兩

乾蘇葉 二兩

右五味以水七升煮取四升分溫四服日三夜一服

婦人藏躁喜悲傷欲哭象如神靈所作數欠伸甘麥大棗湯主  
之



按 甘草小麥大棗湯方義未詳必是譌錯

註 藏心藏也心靜則神藏若為七情所傷則心不得靜而神躁擾不寧也故喜悲傷欲哭是神不能主情也象如神靈所憑是心不能神明也即今之失志癲狂病也數欠伸嗚欠也嗚欠頓悶肝之病也母能令子實故證及也

甘草小麥大棗湯方

甘草 三兩

小麥 一升

大棗 十枚

右三味以水六升煮取三升溫分三服亦補脾氣

婦人吐涎沫醫反下之心下即痞當先治其吐涎沫小青龍湯主之涎沫止乃治痞瀉心湯主之



吐涎沫形寒飲冷也不溫散而反下之則寒飲虛結成痞  
鞭也當先治其吐涎沫以小青龍湯治外寒內飲俟涎沫  
止以半夏瀉心湯乃治痞也

集註

尤怡曰吐涎沫上焦有寒飲也不與溫散而反下之則寒  
內入而成痞然雖痞而猶吐涎沫是寒飲未已不可治痞  
當先治飲而後治痞亦如傷寒例表解乃可攻痞也

小青龍湯方

見肺癰中

瀉心湯方

見驚悸中

問曰婦人年五十所病下利數十日不止暮即發熱少腹裏急  
腹滿手掌煩熱唇口乾燥何也師曰此病屬帶下何以故曾經



半產瘀血在少腹不去何以知之其證唇口乾燥故知之當以  
溫經湯主之

按所病下利之利字當是血字文義相屬必是傳寫之譌

註婦人年已五十衝任皆虛天癸當竭地道不通矣今下血

數十日不止宿瘀下也五心煩熱陰血虛也唇口乾燥任  
衝血傷不止榮也少腹急滿胞中有寒瘀不行也此皆曾  
經半產崩中新血難生瘀血未盡風寒客於胞中為帶下  
為崩中為經水愆期為胞寒不孕均用溫經湯主之者以  
此方生新去瘀煖子宮補衝任也

集李彭曰婦人年五十則已過七七之期任脈虛太衝脈衰



天癸竭地道不通時也所病下利據本文帶下觀之當是崩淋下血之病蓋血屬陰陰虛故發熱暮亦屬陰也任主胞胎衝爲血海二脈皆起於胞宮而出於會陰正當少腹部分衝脈俠臍上行故衝任脈虛則少腹裏急有乾血亦令腹滿內經云任脈爲病女子帶下瘕聚是也手背爲陽掌心爲陰乃手三陰過脈之處陰虛故掌中煩熱也陽明脈俠口環唇與衝脈會於氣街皆屬於帶脈難經云血主濡之以衝脈血阻不行則陽明津液衰少不能濡潤故唇口乾燥斷以病屬帶下以曾經半產少腹瘕血不去則津液不布新血不生此則唇口乾燥之所由生也



溫經湯方

吳茱萸 三兩

當歸

芍藥

芍藥 各二兩

人參

桂枝

牡丹皮

阿膠

生薑 各二兩

甘草 二兩

半夏 半升

麥門冬 一升 去心

右十二味以水一斗煮取三升分溫三服

亦主婦人少腹寒久不受胎兼取崩中去血或月水來過

多及至期不來

集解 李彭曰內經云血氣虛者喜溫而惡寒寒則凝澀不流溫

則消而去之此湯名溫經以瘀血得溫即行也方內皆補



養氣血之藥未嘗以逐瘀爲事而瘀血自去者此養正邪  
白消之法也故婦人崩淋不孕月事不調者並主之  
帶下經水不利少腹滿痛經一月再見者土瓜根散主之

按

再字當是不字若是再字一月兩來與上文不利不合是  
傳寫之譌

註

此亦前條在下未多經候不勻之證帶下胞中病也胞中  
有宿瘀從氣分或寒化則爲白帶從血分或熱化則爲赤  
帶從氣血寒熱錯雜之化則爲雜色之帶也若兼經水不  
利少腹滿痛乃有瘀血故也其經至期不見主以土瓜根  
散者土瓜能逐瘀血廩蟲能開血閉桂枝合芍藥舒陽益



陰通和營氣則瘀去血和經調帶止矣

土瓜根散方

土瓜根

芍藥

桂枝

麤蟲 各三錢

右四味杵為散酒服方寸七日三服

寸口脈弦而大弦則為減大則為芤減則為寒芤則為虛寒虛相搏此名曰革婦人則半產漏下旋覆花湯主之

按

此條詳在傷寒論辨脈法篇錯簡在此旋覆花湯主之一句亦必是錯簡半產漏下則氣已下陷焉有再用旋覆下

氣之理



旋覆花湯方

旋覆花 三兩

葱 十四莖

新絳 少許

右三味以水三升煮取一升頓服之

婦人陷經漏下黑不解膠薑湯主之

註

陷經者謂經血下陷即今之漏下崩中病也黑不解不成

文膠薑湯方亦缺

集註

李氏曰陷經漏下謂經脈下陷而血漏下不止乃氣不攝

血也黑不解者瘀血不去則新血不生榮氣腐敗也然氣

血喜溫惡寒用膠薑湯溫養氣血則氣盛血充推陳致新

而經自調矣



按此條文義必有缺誤姑採此註以見大意

婦人少腹滿如敦狀小便微難而不渴生後者此為水與血俱結在血室也大黃甘遂湯主之

註敦大也小腹胞之室也胞為血海有滿大之狀是血畜也

若小便微難而不渴者水亦畜也此病若在生育之後則為水與血俱結在血室也主之大黃甘遂湯是水血並攻之法也

大黃甘遂湯方

大黃 四兩

甘遂 二兩

阿膠 二兩

右三味以水三升煮取一升頓服之其血當下



婦人中風七八日續來寒熱發作有時經水適斷此為熱入血室其血必結故使如瘧狀發作有時小柴胡湯主之

註詳見傷寒論少陽篇內不復釋

婦人傷寒發熱經水適來晝日明了暮則譫語如見鬼狀者此為熱入血室治之無犯胃氣及上二焦必自愈

註詳見傷寒論少陽篇內不復釋

婦人中風發熱惡寒經水適來得之七八日熱除脈遲身涼和胸脇滿如結胸狀譫語者此為熱入血室也當刺期門隨其實而瀉之

註詳見傷寒論少陽篇內不復釋



陽明病下血譫語者此為熱入血室但頭汗出當刺期門隨其實而瀉之澱然汗出即愈

詳見傷寒論陽明篇內不復釋

婦人經水不利下抵當湯主之

註婦人經水不利下言經行不通利快暢下也乃婦人恒有

之病不過活瘀導氣調和衝任足以愈之今日抵當湯主之夫抵當重劑文內並無少腹結痛大便黑小便利發狂善忘寒熱等證恐藥重病輕必有殘缺錯簡讀者審之

抵當湯方

水蛭

三十箇

蟭蟲

三十枚熬去翅足

桃仁

二十箇去皮尖



大黃

三兩  
酒浸

右四味為末以水五升煮取三升去滓溫服一升

婦人經水閉不利藏堅癖不止中有乾血下白物礬石丸主之

註

藏陰內也不止不去也經水閉而不通瘀宿血也陰中堅

塊不去血乾凝也下白物化血成帶也用礬石丸坐藥中

之此方治下白物若從濕化者可也恐未能攻堅癖乾血也

集註

尤怡曰藏堅癖不止者子藏乾血堅凝成癖而不去也乾

血不去則新血不榮而經閉不利矣由是蓄洩不時胞宮

素濕所積之血與濕化而成白物時時自下是宜先去其

藏之濕礬石燥濕水杏仁潤乾血也



磐石丸方

磐石 三分燒

杏仁 一分

右二味末之煉蜜和丸如棗核大內藏中劇者再內之

婦人六十二種風及腹中血氣刺痛紅藍花酒主之

許六十二種風無可考腹中血氣刺痛用紅藍花酒通經行

血誠要方也

紅藍花酒方

紅藍花 一兩

右一味以酒一大升煎減半頓服一半未去再服

婦人腹中諸疾痛當歸芍藥散主之



註

諸疾腹痛謂婦人腹中諸種疾痛也既曰諸疾痛則寒熱  
虛實氣食等邪皆令腹痛豈能以此一方槩治諸疾痛耶  
當歸芍藥散主之必是錯簡

當歸芍藥散方

見妊娠中

婦人腹中痛小建中湯主之

註

若因木盛土衰中虛急痛者用此補虛緩中定痛可也

小建中湯方

見虛勞中

問曰婦人病飲食如故煩熱不得臥而反倚息者何也師曰此  
名轉胞不得溺也以胞系了戾故致此病但利小便則愈宜腎  
氣丸主之



註病不在胃故飲食如故也病在於胞故不得溺也陽氣不化故煩熱也水不得下行故倚息不得臥也名曰轉胞以胞系乖戾不爽也故致此病但當利小便則愈主之腎氣丸以溫行下焦陽氣陽氣化則溺出諸病自解矣胞者乃謂尿胞非血胞也

集註

趙良曰此方在虛勞中治腰痛小便不利小便拘急此亦

用之何也蓋因腎虛用之也用此補腎則氣化氣化則水

行而愈矣然轉胞之病豈盡由下焦腎虛氣不化出致耶

或中焦脾虛不能散精歸於胞及上焦肺虛不能下輪布

於胞或胎重壓其胞或忍溺入房皆是成此病必求其所



因以治之也

腎氣丸方

乾地黄 八兩

薯蕷 四兩

山茱萸 四兩

澤瀉 三兩

茯苓 三兩

牡丹皮 三兩

桂枝

附子 各一兩

右八味末之煉蜜和丸梧子大酒下十五丸加至二十五

丸日再服

集解李彭曰方名腎氣丸者氣屬陽補腎中真陽之氣也內具

六味丸壯腎水以滋小便之源附桂益命門火以化膀胱之氣則薰蒸津液水道以通而小便自利此所以不用五



苓散而用腎氣丸也

婦人陰寒溫中坐藥蛇床子散主之

註

陰寒前陰寒也治以溫中坐藥蛇床子性溫熱能壯陽故納之以助陽驅陰也

集註

沈明宗曰此治陰掣痛少腹惡寒之方也胞門陽虛受寒現證不一非惟少腹惡寒之一證也但寒從陰戶所受不從表出當溫其受邪之處則病得愈故以蛇床子一味大熱溫助其陽納入陰中俾子宮得暖邪去而病自愈矣

蛇床子散方

蛇床子仁



右一味末以白粉少許和合相得如棗大綿裹內之自然

温

少陰脈滑而數者陰中即生瘡陰中蝕瘡爛者狼牙湯洗之

註

陰中即前陰也生瘡蝕爛乃濕熱不潔而生蠱也用狼牙

湯洗之以除濕熱殺蠱也狼牙非狼之牙乃狼牙草也如

不得以狼毒代之亦可其瘡深洗不可及則用後法也

集註

李昉曰少陰屬腎陰中腎之竅也內經曰滑者陰氣有餘

又云數則為熱故陰中生瘡蝕爛皆濕熱所致狼牙味苦

性寒寒能勝熱苦能殺蟲故主洗之

### 狼牙湯方



狼牙 四兩

右一味以水四升煮取半升以綿纏筋如繭浸湯瀝陰中

日四遍

胃氣下泄陰吹而正喧此穀氣之實也膏髮煎導之

按

膏髮煎導之之五字當是衍文此穀氣之實也之下當有

長服訶梨勒丸之六字後陰下氣謂之氣利用訶梨勒散

前陰下氣謂之陰吹用訶梨勒丸文義始屬藥病亦對蓋

訶梨勒丸以訶梨勒固下氣之虛以厚朴陳皮平穀氣之

實亦相允合方錯簡在雜療篇內下小兒疳蟲蝕齒一方

殺蟲解毒或另有小兒門或列在雜方內今於婦人雜病



之末亦錯簡也

註腎虛不固則氣下泄陰吹而正喧謂前陰出氣有聲也此

穀氣之實謂胃氣實而腎氣虛也以訶梨勒丸固下氣而

瀉穀氣也

膏髮煎方

見黃疸中

小兒疳蟲蝕齒方

雄黃

葶藶

右二味末之取臘月猪脂鎔以槐枝綿裹頭四五枚點藥  
烙之

雜療方第二十三



退五藏虛熱四時加減柴胡飲子方

冬三柴胡八分

白朮八分

陳皮五分

大腹檳榔四枚并皮子者

生薑五分

桔梗七分

春三枳實月加

減白朮共六味

夏三生薑月加三分

枳實五分

甘草三分共八味

秋三陳皮月加三分共六味

右各咬咀分為三貼一貼以水三升煮取二升分溫三服

如人行四五里進一服如四體壅添甘草少許每貼分作

三小貼每小貼以水一升煮取七合溫服再合滓為一服

重煮都成四服疑非仲景方

此方證不屬不釋



長服訶梨勒丸方

訶梨勒

陳皮

厚朴 各三兩

右三味末之煉蜜丸如桐子大酒飲服二十九加至三十丸

按

此方當在前篇穀氣之實也之下

三物備急方

大黃 一兩

乾薑 一兩

巴豆 一兩去皮心  
熬外研如脂

右藥各須精新先搗大黃乾薑為末研巴豆內中合治一千杵用為散蜜和丸亦加蜜器中貯之莫令泄氣主心腹諸卒暴百病若中惡客忤心腹脹滿卒痛如錐刺氣急口



行集醫案全錄 卷二十一  
三  
噤停尸卒死者以煖水苦酒服大豆許三四丸或不下捧  
頭起灌令下咽須臾當差如未差更與三丸當腹中鳴卽  
吐下便差若口噤亦須折齒灌之

解方

方名備急者以備暴然諸腹滿腹急痛及中惡客忤噤閉  
卒死者也若口噤亦須折齒灌之是恐人不急救則死之  
義然不如後人管吹入鼻中之法爲良

集解

李昉曰人卒得病欲死者皆感毒厲邪陰不正之氣而然  
三物相須能蕩邪安正或吐或下使穢氣上下分消誠足  
備一時急需也

治傷寒令愈不復紫石寒食散方



紫石英

白石英

赤石脂

鍾乳 確煉

栝蔞根

防風

桔梗

文蛤

鬼臼 各十分

太乙餘糧 十分 燒

乾薑

附子 炮去皮

桂枝 去皮各 四分

右十三味杵為散酒服方寸七

按方未詳不釋

尸厥脈動而無氣氣閉不通故靜而死也治方

菖蒲屑內鼻兩孔中吹之令人以桂屑着舌下

註形如不病人有氣而脈動失常名曰行屍卒死不知人無



氣而脈動如故名曰尸厥 尸厥乃正氣暴然爲邪氣閉塞  
不通故靜而似死用菖蒲內鼻桂着舌下是通心神啓陽  
氣也

又方

剔取左角髮方寸燒末酒和灌令入喉立起

方解

菖蒲吹鼻桂著舌下而不愈者則用此法是以髮乃血之  
餘血乃心所生用燒則發其陽用酒則行氣血用本人者  
喜一氣相通也

救卒死方

薤搗汁灌鼻中



方卒然昏死皆尸厥也薤白類蒜而小北人謂之小根菜用  
人謂之釣喬是也其味極辛搗汁灌鼻亦通竅取嚏之意  
也

又方

雄雞冠割取血管吹內鼻中

豬脂如雞子大苦酒一升煮沸灌喉中

雞肝及血塗面上以灰圍四旁立起

大豆二七粒以雞子白并酒和盡以吞之

方雄雞冠血及肝卵白豬脂大豆酒醋等物無非用陽物以

勝陰崇也管吹內鼻中謂將雞冠血或合熱酒含在不病



人口內以葦管或筆管插入病人鼻孔中使氣連藥吹之  
其藥自能下咽氣通噤自開也

救卒死而壯熱者方

礬石半觔以水一斗半煮消以漬脚令沒踝

註厥而身壯熱者陽厥府病也外以礬水浸脚蓋以厥起於

下而收攝陽氣也

集註程林曰厥陽獨行故卒死而壯熱岐伯曰血之與氣并走

於上則為大厥厥則暴死礬石收攝藥也以之浸足而收

斂其厥逆之氣

救卒死而目閉者方



騎牛臨面搗薤汁灌耳中吹皂莢鼻中立效

救卒死而張口反折者方

炙手足兩爪後十四壯了飲以五毒諸膏散

有巴豆者

註

卒死張口反折者用炙以通陽氣但飲以五毒諸膏方

救卒死而四肢不收失便者方

馬屎一升水三斗煮取二斗以洗之又取牛洞

稀糞也

一升溫

酒灌口中炙心下一寸臍上三寸臍下四寸各一百壯差

註

尸厥目閉口張失便反張四肢不收陰厥藏病也有如是

之證者用騎牛臨面之法正所以厭邪也薤汁灌耳皂角

吹鼻皆通其諸竅而閉塞者可通也炙手足甲後以通外



陽法也馬屎取吐之法炙中脘關元以通內陽之法也

救小兒卒死而吐利不知是何病方

狗屎一丸絞取汁灌之無濕者水煮乾者取汁

方解凡屎皆發陽氣用狼屎亦取發陽氣也

救卒死客忤死還魂湯主之方

麻黃

三兩  
去節

杏仁

七十箇  
去皮尖

甘草

一兩  
炙

右三味以水八升煮取三升去滓分令咽之通治諸感忤

註

中惡客忤便閉裏實者仲景用備急丸可知無汗表實者

不當用備急丸通裏當用還魂湯以通表也通裏者抑諸

陰氣也通表者扶諸陽氣也昧者不知以麻黃為入太陽



發汗之藥抑知不溫覆取汗則為入太陰通陽之藥也陽氣通動魂可還矣

又方

韭根 一把

烏梅 二七個

吳茱萸 半筋 炒

右三味以水一斗煮之以病人櫛內中三沸櫛浮者生沉者死煮取三升去滓分飲之

方解 韭根吳茱萸烏梅之治亦收陽氣法也浮為陽沉為陰陽

生陰死義也

救自縊死且至暮雖已冷必可治暮至且小難也恐此當言分氣盛故也然夏時夜短於晝又熱猶應可治又云心下若微溫



者一日已上猶可治之方

徐徐抱解不得截繩上下安被臥之一人以脚踏其兩肩手少挽其髮常弦弦勿縱之一人以手按揉胸上數動之一人摩捋臂脛屈伸之若已僵但漸漸強屈之并按其腹如此一炊頃氣從口出呼吸眼開而猶引按莫置亦勿苦勞之須臾可少桂湯及粥清含之令濡喉漸漸能嚥及稍止更令兩人以兩管吹其兩耳朶此法最善無不活者

註

旦至暮陽氣有餘陽主生故雖已冷必可治也暮至旦陰氣有餘陰主死故稍難也自縊之人必可治者恐此當有言語忿爭氣盛不散故可治也暮至旦固難治然遇夏時



夜短於晝又熱皆陽氣有餘猶應可治又云心下若微  
者雖一日已上猶可治之觀此諄諄告切仲景仁心惟恐  
人畏其繁瑣而不治也此法嘗試之十全八九始知言果  
不謬弦猶言緊緊也揉胸按腹摩臂脛屈伸之皆引導  
其氣之法也

凡中暍死不可使得冷得冷便死療之方

屈草帶繞暍人臍使三兩人溺其中令溫亦可用熱泥和屈  
草亦可扣瓦椀底按及車缸以著暍人取令溺須得流去此  
謂道路窮卒無湯當令溺其中欲使多人溺取令溫若湯便  
可與之不可泥及車缸恐此物冷暍既在夏月得熱泥土暖



車缸亦可用也

註

中暑卒死之人不可置放陰涼之處恐其閉熱在內猶被凍之人不可沃以熱湯恐其閉寒在內反為大害也

救溺死方

取竈中灰二石餘以埋人從頭至足水出七孔即活嘗試蠅子落水而死者用竈灰埋之自活

集解

李彭曰竈灰得火土相生之氣以埋人則外溫衛氣而內滲水濕故能使水出七孔而活

治墜馬及一切筋骨損方

大黃

一兩切浸湯成汁

緋帛

如手大燒灰

亂髮

如雞子大燒灰用



久用炊單布一尺敗蒲一握  
燒灰

桃仁四十九箇  
去皮尖熬

甘草節炙剉

右七味以童子小便量多少煎湯成內酒一大盞次下大黃去滓分溫三服先剉敗蒲席半領煎湯浴衣被蓋覆斯須通利數行痛處立差利及浴水赤勿怪卽瘀血也

註外浴以散其瘀內服以下其瘀斯兩得之矣

集註徐彬曰從高墜下法當救損傷筋骨爲主然頓跌之勢內

外之血必無不瘀瘀不去則氣不行氣不行則傷不愈故以桃仁大黃逐瘀爲主緋帛紅花之餘亂髮血之餘合童便以消瘀血湯浴能活周身氣血然筋骨瘀血必有熱氣



滯鬱故以炊單布受氣最多而易消者以散滯通氣從其類也加少炙甘草補中以和諸藥也















